

# TULAFONO TAU FAAOFI O TEUTEUGA O LE TULAFONO O FANUA MA SUAFA 2022

## SAMOA

### Faamatalaga e Faamalamalama ai

#### 1.0 Sini autu ma mafuaaga:

- 1.1 Ua talosagaina i le Tulafono Tau Faaofi le teuteuina o le Tulafono o Fanua ma Suafa 2020 (“Tulafono autu”) e faailoa manino ai nisi o mataupu na maua ina ua maea ona pasia ma amata faamamaluina le Tulafono autu, aemaise lava le tofiaina o faamasino o le Faamasinoga o Fanua ma Suafa (LTC) ma tulaga faasaoina ma le soloaiga o Sui Peresetene ma faamasino Samoa na tofia i lalo o le Tulafono o Fanua ma Suafa 1981 (“Tulafono ua soloia”) agai i le faatulagaga fou o le Faamasinoga o Fanua ma Suafa i lalo o le Tulafono autu ma le Faavae.
- 1.2 O sini autu o le Tulafono Tau Faaofi e faapea:
  - (a) ua aiaia ai mo le tofiaina, o tuutuuga ma aiaiga, faamalolo lē tumau ma le faatulaieseina o faamasino o le Faamasinoga o Fanua ma Suafa;
  - (b) ua aiaia ai mo aiaiga faasaoina ma aiaiga tau soloaiga e faasino i Sui Peresetene ma faamasino Samoa ua tofia i lalo o le Tulafono ua soloia;
  - (c) ua faasa’oina ai nisi o faasinomaga ina ia faamautinoa ai le ogatasi lelei o le lomiga faa-Peretania ma le lomiga i le Gagana Samoa o le Tulafono autu.

## 2.0 Fuaiupu:

- Fuaiupu 1:** - ua aiaia ai mo le igoa puupuu ma le aso e amata faamamaluina ai le Tulafono Tau Faaofi.
- Fuaiupu 2:** - ua teuteuina ai le fuaiupu 2 o le Tulafono autu e ala i le faaofi o faamatalaga fou mo upu “Taitaifono”, “faamasino” ma le “tautua faa-matai”. Ua teuteuina ai foi nisi o faamatalaga o uiga o upu ina ia i ai ni faasinomaga i le Vaega 5A fou ua faaofiina i le Tulafono autu.
- Fuaiupu 3:** - ua teuteuina ai le fuaiupu 12(1)(b) o le Tulafono o Fanua ma Suafa 2020 (e na o le lomiga i le Gagana Samoa o le Tulafono autu) e ala i le faaofiina o le upu “lē” i le tuanai ai o le upu “ia” ina ia ogatasi ai ma le lomiga faa-Peretania o le Tulafono autu.
- Fuaiupu 4:** - ua teuteuina ai le fuaiupu 43(2) o le Tulafono autu e ala i le aveesea o upu “ma iloiloga” ina ia talafeagai lelei ma ogatasi ma le puleaga faaletulafono a le Faamasinoga o Fanua ma Suafa.
- Fuaiupu 5:** - ua teuteuina ai le fuaiupu 54(1)(a) o le Tulafono autu e ala i le suia o le “Sui Peresetene” i le “Peresetene Lagolago” ina ia faamanino ai e faapea o le Peresetene Lagolago e seei i le Faamasinoga Muamua o Fanua ma Suafa ae le o le Sui Peresetene.
- Fuaiupu 6:** - ua faaofi ai le Vaega 5A fou (*fuaiupu 61A i le 61J* ua fautuaina) i totonu o le Tulafono autu, ina ia aiaia ai mo galuega tauave a le *Komisi o le Faamasinoga o Fanua ma Suafa* (“Komisi”) ma le tofia o faamasino mo le Faamasinoga o Fanua ma Suafa e faapea:
- (a) *Fuaiupu 61A* - ua aiaia ai mo galuega tauave a le Komisi o le fautuaina O Le Ao o le Malo mo le

tofia, o tuutuuga ma aiaiga o tofiga ma le faamalolo lē tumau ai ma le faatulaieseina o faamasino o le Faamasinoga o Fanua ma Suafa ina ia tusa ai ma le Mataupu 104E(4) o le Faavae. E lē gata i lea, ua tuuina atu ai le malosiaga i le Komisi e faatonutonu faaletulafono ai ana ia lava tualumaga ma faia tulafono faafoe ma taiala mo le faatonutonuina ma le faafaigofieina o ana galuega tauave i lalo o lenei fuaiupu;

- (b) *Fuaiupu 61B* - ua tuuina atu ai le malosiaga i le O Le Ao o le Malo e tofia ai tagata talafeagai ma agavaa e avea ma Sui Peresetene, Peresetene Lagolago po o faamasino o le Faamasinoga Muamua o Fanua ma Suafa;
- (c) *Fuaiupu 61C* - ua aiaia ai mo agavaa o se tagata e ao ona tofia e avea ma Sui Peresetene;
- (d) *Fuaiupu 61D* - ua aiaia ai mo tulaga agavaa o se tagata e ao ona tofia e avea ma Peresetene Lagolago. Ua aiaia ai foi mo le soloaiga o se Sui Peresetene na tofia i lalo o le Tulafono ua soloia ina ia tofia e avea o se Peresetene Lagolago i lalo o lenei fuaiupu ae peitai e lē agavaa e tofia e avea ma se sui o le Faamasinoga o Talosaga ma Iloiloga o Fanua ma Suafa i lalo o le Mataupu 104C o le Faavae, seia vagana ai ua ia faamalieina tulaga agavaa ua taua i lalo o le faafuaiupu (1);
- (e) *Fuaiupu 61E* - ua aiaia ai mo tulaga agavaa o faamasino o le Faamasinoga Muamua o Fanua ma Suafa. Ua aiaia ai foi mo le soloaiga o faamasino Samoa na tofia i lalo o le Tulafono ua

soloia, ina ia tofia e avea ma faamasino o le Faamasinoga Muamua o Fanua ma Suafa;

- (f) *Fuaiupu 61F* - ua aiaia ai mo puipuiga faaletulafono o faamasino o le Faamasinoga o Fanua ma Suafa ina ia tutusa ma puipuiga faaletulafono o faamasino o le Faamasinoga Sili;
- (g) *Fuaiupu 61G* - ua aiaia ai mo le vaitaimi e nofoia ai le tofi e se faamasino o le Faamasinoga o Fanua ma Suafa, ma faapea foi ma aiaiga e faasino i le faamavae ai o se faamasino o le Faamasinoga o Fanua ma Suafa mai le tofi;
- (h) *Fuaiupu 61H* - ua aiaia ai mo mafuaaga e faamalolo lē tumau ai ma faatulaiese ai se faamasino o le Faamasinoga o Fanua ma Suafa;
- (i) *Fuaiupu 61I* - ua aiaia ai mo mafuaaga e faatulaiese ai le Peresetene o le Faamasinoga o Fanua ma Suafa ina ia tusa ai ma le Mataupu 104D(3) o le Faavae;
- (j) *Fuaiupu 61J* - ua aiaia ai mo totogi ma faamanuiaga e agavaa i ai le Peresetene, Sui Peresetene, Peresetene Lagolago ma Faamasino o le Faamasinoga Muamua o Fanua ma Suafa, ma faapena foi ona tuuina atu ai le malosiaga i pulega talafeagai e fitoitonu ma le fuafuaina tatau o ia faamanuiaga.

**Fuaiupu 7:** - ua teuteuina ai le fuaiupu 67 o le Tulafono autu ina ia aiaia ai mo se faafuaiupu (8) fou e faamanino ai totogi ia e ao ona mauaina e le Sui Peresetene ma faamasino Samoa, o i latou ia ua tofia ina ia tusa ai ma le fuaiupu 61D(3) ma le 61E(2).

- Fuaiupu 8:** - ua aiaia ai mo aiaiga faasaoina ma aiaiga tau soloaiga ina ia faasaoina ai ma aloaia faaletulafono so o se faaiuga po o se gaoioiga lea na faia, po o na faamoemoe e faatino mo le faamoemoega o le Tulafono autu, mai i le taimi na amata faamamaluina ai le Tulafono autu, seia oo i le aso e tuuina i ai le maliega a le O Le Ao o le Malo i lenei Tulafono Tau Faaofi.



.....  
(Hon MATAMUA Seumanu Vasati Sili Pulufana)

**MINISITA O FAAMASINOGA MA PULEGA TAU FAAMASINOGA**

**TULAFONO TAU FAAOFI O TEUTEUGA  
O LE TULAFONO O FANUA MA SUAFA 2022**

**SAMOA**

**Faatulagaina o Aiaiga**

1. Igoa puupuu ma le amataga
2. Ua teuteuina le fuaiupu 2
3. Ua teuteuina le fuaiupu 12
4. Ua teuteuina le fuaiupu 43
5. Ua teuteuina le fuaiupu 54
6. Ua faaofi le Vaega 5A fou
7. Ua teuteuina le fuaiupu 67
8. Aiaiga faasaoina ma aiaiga tau soloaiga

---

2022, Nu.

**O SE TULAFONO TAU FAAOFI UA TAUA**

**O SE TULAFONO e teuteuina ai le Tulafono o Fanua ma Suafa 2020 (“Tulafono autu”) ina ia aiaia ai mo le tofiaina, tuutuuga ma aiaiga, faamalolo lē tumau ma le faatulaieseina o faamasino o le Faamasinoga o Fanua ma Suafa ma mo faamoemoega e fesootai i ai.**

**UA FAIA** e le Fono Aoao Faitulafono a Samoa i totonu o le Palemene ua potopoto e faapea:

**1. Igoa puupuu ma le amataga:**

- (1) E mafai ona taua lenei Tulafono o le Tulafono o Teuteuga o le Tulafono o Fanua ma Suafa 2022.
- (2) O lenei Tulafono o le a avea e faapea na amata faamamaluina i le aso 15 o Mati 2021, ae vagana ai le fuaiupu 8.
- (3) O le fuaiupu 8 e amata faamamaluina i le aso o le a tuuina i ai le maliega a le O Le Ao o le Malo.

**2. Ua teuteuina le fuaiupu 2:**

Ua teuteuina le fuaiupu 2 o le Tulafono autu e faapea:

- (a) ia faaofi se faamatalaga fou o uiga o upu i lona faasologa sao i le pi faitau faa-Peretania:

“Taitaifono” o lona uiga o le Taitaifono o le Faamasinoga o Talosaga ma Iloiloga o Fanua ma Suafa ua tofia i lalo o le Vaega IX o le Faavae;

“faamasino” o lona uiga o se Faamasino o le Faamasinoga o Fanua ma Suafa ua tofia i lalo o le Vaega 5A;

“tautua faa-matai” o lona uiga o le tautua ma matafaioi e manaomia ona faatinoina e se tagata e fesootai ma lona suafa matai ma, e aofia ai le tautuaina lelei o lona aiga, nuu ma alaalfaga e tusa ai ma tu ma aganuu a Samoa ma lona faaaogāina;”;

- (b) i le faamatalaina o uiga o upu -
- (i) “Faamasinoga” ia faaofi upu “Faamasinoga Maualuga o Fanua ma Suafa” i le tuanai ai o upu “Faamasinoga Muamua o Fanua ma Suafa,”;
  - (ii) “Sui Peresetene” ia faaofi upu “i lalo o le Vaega 5A” i le tuanai ai o le upu “Komisi”;
  - (iii) “tulafono faafoe” ia faaofi le upu “the” i le tuanai ai o le upu “of” mo na o le lomiga faa-Peretania o le Tulafono autu;
  - (iv) “Peresetene Lagolago” ia faaofi upu “i lalo o le Vaega 5A” i le tuanai ai o le upu “Komisi”.

**3. Ua teuteuina le fuaiupu 12:**

I totonu o le fuaiupu 12(1)(b) o le Tulafono o Fanua ma Suafa 2020 (lomiga i le Gagana Samoa o le Tulafono autu), ia faaofi le upu “lē” i le tuanai ai o le upu “ia”.

**4. Ua teuteuina le fuaiupu 43:**

I totonu o le fuaiupu 43(2) o le Tulafono autu, ia aveese upu “ma iloiloga” i le tuanai ai o le upu “faaiuga”.

**5. Ua teuteuina le fuaiupu 54:**

I totonu o le fuaiupu 54(1)(a) o le Tulafono autu, mo upu “Sui Peresetene” ia suia i upu “Peresetene Lagolago”.

**6. Ua faaofi le Vaega 5A fou:**

I le tuanai ai o le Vaega 5 o le Tulafono autu, ia faaofi e faapea:

**“VAEGA 5A**

**KOMISI O LE FAAMASINOGA O FANUA MA  
SUAFA MA LE TOFIAINA O FAAMASINO MO LE  
FAAMASINOGA O FANUA MA SUAFA**

*Vaevaega 1 - Komisi o le Faamasinoga  
o Fanua ma Suafa*



**“61A. O galuega tauave a le Komisi o le Faamasinoga o Fanua ma Suafa (“Komisi”):**

- (1) E tusa ai ma le Mataupu 104E(4) o le Faavae, e mafai e le Komisi ona fautuaina le O Le Ao o le Malo e uiga i tulaga nei:
  - (a) o le tofiaina o se faamasino o le Faamasinoga o Fanua ma Suafa;
  - (b) o tuutuuga ma aiaiga o le tofiaina o se faamasino;
  - (c) o le faamalolo lē tumau po o le faatulaieseina o se faamasino.
- (2) E mafai e le Komisi ona faatonutonu faaletulafono ana ia lava taualumaga ma faia tulafono faafoe ma taiala e pei ona ia manatu ua talafeagai ai mo le faatonutonuina ma le faafaigofieina o ana galuega tauave i lalo o lenei Vaega.
- (3) O so o se tulafono faafoe ma taiala ua faia e tusa ai ma le faafuaiupu (2), e ao ona lomina faasalalau.

*Vaevaega 2 - Tofiaina o Faamasino  
mo le Faamasinoga o Fanua ma Suafa*

**61B. O faamasino o le Faamasinoga o Fanua ma Suafa:**

E tusa ai ma le Mataupu 104E(4) o le Faavae, e mafai e le O Le Ao o le Malo, i le faia i luga o le fautuaga a le Komisi, ona ia tofia ni tagata talafeagai ma agavaa i lalo o lenei Vaevaega e avea ma:

- (a) Sui Peresetene; po o
- (b) Peresetene Lagolago; po o
- (c) Faamasino o le Faamasinoga Muamua o Fanua ma Suafa.

**61C. Tulaga agavaa o Sui Peresetene:**

E mafai ona tofia se tagata e avea ma Sui Peresetene pe afai o lea tagata:

- (a) o se loia Samoa o ia lea na galue i lalo o le Tulafono talafeagai mo loia i totonu o Samoa, mo se vaitaimi e lē itiiti ifo na i le 10 tausaga; ma

- (b) o lo o ia umia se suafa matai ma o lo o faatino le tautua faa-  
matai i totonu o o latou nuu mo se vaiataimi ia lē itiiti ifo i le  
tolu (3) tausaga sosoo i le taimi lava lea a o lumanai ai le  
tofiaina; ma
- (c) ua manatu le Komisi ua agavaa e ala i ona uiga vaaia, mafai  
gafatia, tulaga ma le tauleleia; ma
- (d) o lo o nofo i totonu o Samoa mo se vaiataimi e lē itiiti ifo ma le  
tolu (3) tausaga sosoo; ma
- (e) e lava lona silafia ma le poto masani i le aganuu a Samoa ma  
lona faaaogāina; ma
- (f) e le i ausia le matua o tausaga e 68.

**61D. Tulaga agavaa o Peresetene Lagolago:**

- (1) E mafai ona tofia se tagata e avea ma Peresetene Lagolago pe  
afai o lea tagata:
  - (a) o lo o avea pe na avea muamua ma faamasino o le  
Faamasinoga o Fanua ma Suafa mo se vaiataimi a itiiti  
mai e tolu (3) tausaga; ma
  - (b) ua faamalieina tulaga o agavaa mo le tofiaina o se  
faamasino i lalo o le fuaiupu 61E.
- (2) Mo le faamoemoe o le faafuaiupu (1)(a), o le tolu (3) tausaga  
o le avea ai ma faamasino e aofia ai foi ma tausaga na avea ai  
se tagata ma faamasino Samoa i lalo o le Tulafono ua soloia.
- (3) O se Sui Peresetene na tofia i lalo o le Tulafono ua soloia, ua  
faatatauina e faapea ua tofia e avea ma Peresetene Lagolago  
i lalo o lenei fuaiupu seia oo ina faamutaina le vaiataimi na  
nofoia ai lona tofi ina ia tusa ai ma le fuaiupu 61G(1).
- (4) O se faamasino na tofia i lalo o le faafuaiupu (3), e lē agavaa  
ona tofia e avea ma sui o le Faamasinoga o Talosaga ma  
Iloiloga o Fanua ma Suafa i lalo o le Mataupu 104C o le  
Faavae, seia vagana ai ua ia faamalieina tulaga agavaa ua  
taua i lalo o le faafuaiupu (1).

**61E. Tulaga agavaa o faamasino o le Faamasinoga Muamua o Fanua ma Suafa:**

- (1) E mafai ona tofia se tagata e avea ma faamasino o le Faamasinoga Muamua o Fanua ma Suafa pe afai o lea tagata:
  - (a) o se tagatanuu o Samoa o ia lea na nofomau i totonu o Samoa mo se vaitaimi e lē itiiti ifo i le tolu (3) tausaga sosoo a o lumanai ai lona tofiaina; ma
  - (b) o lo o ia umia se suafa matai ma na faatino lana tautua faa-matai i totonu o lona nuu mo se vaitaimi e lē itiiti ifo i le tolu (3) tausaga sosoo; ma
  - (c) ua manatu le Komisi ua agavaa e ala i ona uiga vaaia, mafai gafatia, tulaga ma le tauleleia; ma
  - (d) ua lava lona silafia ma le poto masani i aganuu a Samoa ma lona faaaogāina; ma
  - (e) o lona tulaga agavaa aupito maualalo o se tusi pasi faamaonia i mataupu tau Tulafono, po o se tusipasi faamaonia i so o se isi lava aoaoga talafeagai e pei ona fuafuaina e le Komisi; ma
  - (f) e le i ausia le matua o tausaga e 68.
- (2) O se faamasino Samoa na tofia i lalo o le Tulafono ua soloia, ua faatatauina e faapea ua tofia e avea ma faamasino o le Faamasinoga Muamua o Fanua ma Suafa i lalo o lenei fuaiupu seia oo ina faamutaina le vaitaimi na nofoia ai lona tofi ina ia tusa ai ma le fuaiupu 61G(1).

**61F. Puipuiga faaletulafono o faamasino:**

E tutusa puipuiga faaletulafono o se faamasino ma se faamasino o le Faamasinoga Sili.

**61G. Nofoia i le tofi:**

- (1) O se faamasino ua tofia i lalo o lenei Vaevaega e umia e ia le tofi seia vagana ai:
  - (a) ua ia ausia le matua o tausaga e 68, i le noatia ma le fai fuafua i le faafuaiupu (2); po o

- (b) ua ia faamavae mai le tofiga i lalo o le faafuaiupu (5);  
po o
- (c) ua faatulaiese o ia mai le tofi i lalo o le fuaiupu 61H(1).
- (2) E mafai e le O Le Ao o le Malo, i le faia i luga o le fautuaga a le Komisi, ona faaopoopo le taimi ia lē sili atu i le 12 masina, po o mo ni vaitaimi sosoo taitasi e lē sili atu i le 12 masina, le vaitaimi po o vaitaimi o le tofi o se faamasino ua atoa le 68 tausaga o lona matua.
- (3) E mafai e le Komisi ona amanaia tulaga nei i le fautuaina ai O Le Ao o le Malo i lalo o le faafuaiupu (2):
  - (a) o se pepa ma'i e sainia e se fomai sinia ua filifilia e le Ofisa Sili o Pulega a le Matagaluega; ma
  - (b) se lipoti o iloiloga o galuega faatino a se faamasino.
- (4) E leai se mea e faia e se faamasino ua tofia i lalo o lenei Vaevaega i le faatinoga o ana galuega tauave ua faatatauina e faapea, ua lē aloaia ona o le na o le mafuaaga e faapea, ua ausia e le faamasino le matua o tausaga lea e manaomia ai o ia i lalo o lenei fuaiupu ina ia malolo litaea ai po o le faapea ua muta le vaitaimi o lona tofiga.
- (5) E mafai e se faamasino ona faamavae mai i lona tofi e ala i le tuuina atu o se faasilasilaga tusitusia i le O Le Ao o le Malo e ala atu i le Komisi.

**61H. Faamalolo lē tumau ma le faatulaieseina o se faamasino:**

- (1) E na o le Ao o le Malo e mafai ona ia faatulaiese se faamasino na tofia i lalo o lenei Vaevaega, i le faia i luga o le fautuaga a le Komisi i luga o mafuaaga nei:
  - (a) o se amio lē pulea lea e mafai ona aofia ai se moliaga tau solitulafono ua faamaonia faaetulafono; po o
  - (b) le lē atoatoa o le malosi o le tino po o le mafaufau, ua lē mafai ai e le faamasino ona faatino galuega tauave o lona tofi.

- (2) E mafai e le O Le Ao o le Malo, i le faia i luga o le fautuaga a le Komisi, ona faamalolo lē tumau se faamasino mai lona tofi, pe afai o lo o talia se suesuega i ni tuuaiga o se amioga lē pulea, ma e mafai i so o se taimi, ona faalēaogāina le faamalolo lē tumau.

**61I. Mafuaaga mo le faatulaiese o le Peresetene i lalo o le Mataupu 104D(3) o le Faavae:**

- (1) E tusa ai ma le Mataupu 104D(3) o le Faavae, e faatoa mafai ona faatulaiese le Peresetene mai lona tofi i luga o mafuaaga nei:
- (a) o se amio lē pulea ua taua lea e mafai ona aofia ai se moliaga faasolitulafono ua faamaonia faaletulafono; po o
- (b) le lē atoatoa o le malosi o le tino po o le mafaufau, ua lē mafai ai e le Peresetene ona faatino galuega tauave o lona tofi.
- (2) E tusa ai ma le Mataupu 104D(3) o le Faavae, o isi mafuaaga mo le faatulaiese o le Peresetene e aofia ai:
- (a) amioga e tulai mai ai po o e faaono tulai mai ai ni feeseeseaiga i le tofi o le Peresetene po o le Faamasinoga; po o
- (b) amioga ia e mafai ona aafia ai le tulaga talitonuina e tagata lautele o le Faamasinoga o Fanua ma Suafa.

**61J. O totogi ma faamanuiaga:**

- (1) E tusa ai ma le Mataupu 104G o le Faavae, e agavaa le Peresetene ina ia totogiina i totogi, alauni ma isi faamanuiaga e pei ona faatulagaina mai e le O Le Ao o le Malo, e faia i luga o le fautuaga a le Kapeneta, i le maea ai ona feutagai ma le Komiti Faufautua mo Totogi.
- (2) E agavaa se Sui Peresetene, Peresetene Lagolago ma se faamasino o le Faamasinoga Muamua o Fanua ma Suafa ina ia totogiina i totogi, alauni ma isi faamanuiaga e pei ona

faatulagaina mai e le O Le Ao o le Malo, i le faia i luga o le fautuaga a le Kapeneta, i le tuanai ai ona maua e le Kapeneta fautuaga mai le Komisi.

- (3) E lē tatau ona faaitiitia totogi o Faamasino a o faagasolo le vaitaimi o o latou tofiga, seia vagana ai ua avea ma se vaega o faaititiga lautele o totogi faatatauina mo tagata uma ia o lo o fuafuaina tatau i le Tulafono.

**7. Ua teuteuina le fuaiupu 67:**

Ua teuteuina le fuaiupu 67 o le Tulafono autu e ala i le faaofiina i le tuanai ai o le faafuaiupu (7) o se faafuaiupu fou e faapea:

- “(8) O se faamasino ua avea e faapea na tofia i lalo o le fuaiupu 61D(3) ma le 61E(2), e faaauau pea ona agavaa ina ia totogiina i le totogi masani ma isi faamanuiaga na ia mauaina muamua a o lumanaia ai le amata faamamaluina o lenei Tulafono seia vagana ai ua faatulagaina e le O Le Ao o le Malo totogi, alauni ma isi faamanuiaga ina ia tusa ai ma le fuaiupu 61J.”.

**8. Aiaiga faasaoina ma aiaiga tau soloaiga:**

I le amata faamamaluina ai o lenei Tulafono, o so o se faaiuga po o se gaoioiga na faia po o ua faatatauina na faia mo le faamoemoe o le Tulafono autu (mo le vaitaimi i le va o le aso 15 o Mati 2021 ma le aso e tuuina i ai le maliega a le O Le Ao o le Malo i lenei Tulafono), e aloaia pea e faapei ai na faia i lalo o lenei Tulafono.

---